



UPA2015/117
4. maj 2015
Sara Olsvig

Ingerlatseqatigiiffiit Kalaallit Nunaannilu oqartussaasut whistleblowereqarnissamut aaqqissuussinissamut (kinaassutsimik ersersitsisuumngitsumik ilisimasamik ingerlatitseeqqiisinnanermut periarfissiisumik) malittarisassiuunneqarnissaannut Naalakkersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq Naaja H. Nathanielsen, Inuit Ataqatigiit)

Inuit Ataqatigiit Inatsisartunut ilaasortaatitatta Naaja H. Nathanielsenip whistleblowereqarsinnaalernissaq pillugu Inatsisartunut aalajangiiffigisassatut siunnersuutaa maanna saqqummiunneqaqqippoq. Whistleblowereqarneq isumaqarpoq suliffeqarfimmi suliffeqarminninulluunniit atasumik pisunik inatsisinut unioqqutitsinerusunik allatigulluunniit unneqqaserlunnerusunik sulisoq ilisimasaqalersimasoq suliffini annaassallugu eqqasuuteqartariaqarani kinaassutsiminillu ersersitsinani oqariartorsinnaanissaanik aaqqiineq.

Ukiami 2013-mi Inatsisartut ataatsimiinneranni siunnersuut partiinit tamanit akuersaarneqarpoq taamanikkullu siunnersuutip aappassaaneernerani ataatsimiititaliap suliaanut Naalakkersuisunut siulittaasuannit ima oqaaseqarfigineqarluni – issuaavunga:

“Pissaanermik atornerluisoqarsinnaanerani pinaveersaartitsisunik aamma toringngitsumik inatsisinilluunniit unioqqutitsilluni pisortat aningaasaataannik atuisoqarsinnaanerani pinaveersaartitsilluni suliniutit ersarissuunissaat Naalakkersuisut kissaatigaat. Taamaattumik isumaliutissiissut Naalakkersuisut tapersorsorpaat, allaffeqarfinnilu sulisuusut atorfeqartitaanerminnut kinguneqartitsisoqarnissaanik ersissuteqaratik atornerluisoqarsinnaanerani mianersoqqussuteqarsinnaanissaannut, tassa kinaassusertik paasitinnikkaluarlugu avammut nalunaaruteqarsinnaasarnissaannut aaqqissuussisoqarnissaa sulissutigissallugu piareersimallutik. Naalakkersuisuttaaq suliffinnut namminersortunut assingusunik aaqqissuussinissat piareersimaffiginiarpaat taamatuttaaq qulakkeerinnittussat, suliffiit namminersortut sulisuisa, nioqqutissanik pilersuisuisa pisisartuisalu, suliffimmi pissutsinik unneqqarissuumngitsunik inatsisinilluunniit unioqqutitsisunik pilersoqalissagaluarpat ernumassuteqaratik nalunaarutiginnittarnissaanut periarfissiisussanik”. Issuaaneq naavoq.

Ukiunili taakkunani Naalakkersuisooqatigiisusut suliaq naammassinngitsoorpaat ukiorlu ataaseq qaangiutiinnartoq tamatta nalunngatsitit tigussaasorujussuarmik whistleblowereqarnissaq qanoq pingaaruteqartigisinnaanersoq misigaarput.

Ukiami 2014-mi Inatsisartuni ataatsimiinnissaraluarput aallarteruttortorlu toringngilluinnartumik inatsisinillu unioqqutitsilluni ilaatigut Naalakkersuisunut Siulittaasup akissuteqarsimasorpiamit pisortat aningaasaataannik atornerluisimanerani Inatsisartut ilisimatinneqarpugut. Ilisimasat malillugit taamatut paasisaqarnerput whistleblowerimeersuuvoq. Pisortaqarfiit ilaanni atorfilik arlaat kinaassutsiminik ersertitsinngittumik ilisimasanik ingerlatitseeqqippoq nunattalu karsianit aningaasanik atornerluisimanerit unneqqaserluttuliorsimanerillu saqqummerput.

Assersuutip takutippaa whistleblowereqarnissaq qanoq pingaaruteqartiginersoq. Inuit Ataqatigiinniilli ilanngullugu oqaatiginngitsoorusunngilarput pisut iliuutsillu unneqqaserluttut unioqqutitsinerusullu whistleblowerimit taamalu ilinikkut innuttaasunit Inatsisartuniillu paasineqarnissaat pillugu iliuseqarnissaq naammanngittoq. Naalackersuisuusut suliffeqarfinnilu tamani aningaasanik pissaanermilluunniit atornerluinnginnissaat pillugu erseqqissumik paasinartumillu ingerlatsinissaq pisariaqarpoq. Pisortani suliffeqarfinnilu sullissinerput pillugu immitsinnut piumasaqarnerput sakkortusariaqarpoq. Apeqquserneqarsinnaanngittumik nalornitsitsinngittumillu ingerlatsineq tatiginassutsimik pilersitsisuuvoq. Nunattalu tatiginassuseq ukiuni makkunanerpiaq atorfissaqartippaa.

Innuttaqatitsinnut nunattalu avataanit soqutiginnittunut Nunatsinni politikikkut inuussutissarsiornikkullu ingerlatsinerup qaffasissunik piumasaqaateqarfiusunik ingerlanneqarneri takutittariaqarpavut.

Inuiaqatigiinni ineriartortuni tamallu oqartussaaqantaanerannik pingaartitsisuni tamanna qitiuvoq. Whistleblowereqarnissamat siunnersuut tassunga tunngavoq.

Inuit Ataqatigiinnit nuannaarutigaarput siunnersuut pingaarteqisarput ullumikkut Naalackersuisuusunit aamma pingaartinneqarmat. Naalackersuisoqarfinni atuutsissallugu aalajangiunneqareerpoq, maannalu tullinnguuttoq tassaavoq suliffeqarfinni namminersortuni pisortallu pigisaanni aamma atuutsilersissallugu.

Tamassuma piviusunngortinnissaanut aporfissat piiartariaqarput. Neriuppugut ataatsimiititaliamit suliaq tamanna tigulluarlugu naammassilluarneqarumaartoq.

Siunnersuutip aappassaaneernejartinnagu inatsisinut ataatsimiititaliami suliarineqaqqaarnissaa inassutigaarput.